

大名府志卷之十六

人物

流寓

唐田縉字雲長永樂人本平州盧龍人貞元十年入朝授左驍衛將軍封扶風郡公元和中拜夏綏銀節度使城宥州以扼寇路王師伐蔡上橐駝牛馬助軍土蕃寇豐州縉設伏邀其歸路斬殺過當終左領軍將軍弟華太常少卿尚永樂新鄉二公主

史憲忠字元貞憲誠弟其先奚內徙靈武爲建康人官田弘正牙門將討齊蔡爲先鋒閱三十戰中流矢

酣鬪不解由是著名

史孝章字得仁憲誠子天資修謹憲誠用河北故事孝章涕泣諫并請討同捷以自明文宗賢之及魏亂父卒帝念史氏而卿孝章故奪喪拜金吾衛將軍徙節鄜坊自邠寧以病告歸卒於行贈右僕射

宋閻守恭本榆次人徙大名性沉勇御軍整嚴從征積功至勅史鈐轄所得俸祿悉以予人

金烏延吾里補自曷懶路徙大名領謀克攻滄青恩密楚揚通泰等州得戶五萬四千馬牛萬餘匹降營四破營三敗敵兵三十餘萬襲猛安官至龍虎衛上

將軍

元郭昂自林慮流寓開州通經史工詩習刀槊能挽
強中的廉希憲薦之官至廣東宣慰司都元帥招降
徭獐蠻人服其威子震懷遠大將軍鎮杭州豫廣西
宣慰副使惠延平總管謙屯田提舉坤益州知州

忽都自北庭從清豐武勇蓋世由宿衛爲南宿州鎮
將從世祖南征年幾七十每率先士卒冒矢石身被
數十創戰功居多贈廣平路總管封漁陽郡侯子拜
降母徐氏教之從師大名講解精細郡守異之長從
丞相阿朮攻宋功最一軍遷慶元治中力請發粟四

萬饑民賴以全活陞浙東廉訪副使豪強懾服入爲
工部尚書有能聲贈資政大夫江浙右丞諡貞惠

烏古孫仲本女真烏古部父璧金明威將軍金亡來
徙大名仲儻有奇節遭金季世憤無所施用高言
危行親交避之遂縱酒佯狂以自晦子澤字潤甫性
剛毅讀書舉大畧才幹過人丞相阿朮一見奇之辟
爲掾時宋廣王起福州元帥唆都問計於澤澤言當
直擣閩關唆都用之遂平閩廣上聞命知興化軍字
民卹幼除奸安衆勵學百姓感之卒官福建廉訪使
諡正憲澤子良楨字幹卿號約齋好讀書以蔭補官

請定徒減杖法拜行臺劾丞相達識帖睦爾賣國勸
改國俗薦劉因從祀進榮祿大夫賜玉帶重定律書
有詩文奏議

方技

宋盧杲大名人邑之巨族以方技名河朔間政和二
年被旨校正和濟局方刪補治法岐黃而下數百家
無不通究著易說五十篇元好問銘其墓

元李穀號東齋大名人通百家書尤精於醫爲懷慶
路醫學提舉子敬恒世其業

郭大巨開州人少遇異人授以脈訣與子隆俱以醫

名晉魏問

國朝魏宗元南樂人工醫精米家山水

王渠軒元城人以畫梅著

孟國俊號百夫元城人博士善畫

列女

顓頊妃女祿

顓頊妃嬌極

衛莊姜美而無子逮下以寬能不妬忌教子以正能
豫必其賢否衛人爲賦碩人之詩

衛定姜遭國多難而言必以正事詳左傳

衛共姜世子共伯之妻早寡父母欲嫁之作柏舟之詩以自誓

許穆公夫人宣公之女也衛爲狄所滅夫人欲歸寧而義不可往賦載馳以見志君子美其發於情止於禮義

宋桓公夫人宣公之女也生襄公而出歸於衛襄公卽位夫人思之而義不可往作河廣二章小序曰宋襄公母思宋也

漢孝元皇后元城王禁女初元元年立爲皇后成帝竟寧元年尊爲皇太后任用王鳳王音王商王根以

至王莽遂移漢祚莽自立求璽太后曰而屬父子宗族蒙漢家力旣無以報而奪取其國狗猪不食其餘莽壞孝元廟太后聞之驚泣冬祠臘獨用漢家止臘孝平皇后王莽女也十歲立爲皇后歲餘平帝崩尊爲皇太后爲人婉孌有節操自劉氏廢常稱疾不朝會莽敬憚之令新成公孫建世子問疾后人怒鞭其侍御及漢兵至后曰何面目見漢家自投火死

質帝母陳夫人家本衛郡少以聲伎入宮生帝熹平四年小黃門趙祐議郎畢整言春秋之義母以子貴隆漢盛典尊崇母氏凡在外戚莫不加寵今質帝母

陳夫人誕生聖皇未有稱號夫臣子雖賤尚有追贈之典况母見在不蒙崇顯之封無以述尊先世垂示後世也帝乃拜陳夫人爲渤海孝王妃使中常侍持節授印綬遣太常以三牲告靜陵

昭烈皇后陳留人吳壹妹也章武元年夏五月策曰朕承天命奉至尊臨萬國今以后爲皇后遣使持節丞相亮授璽綬承宗廟母天下皇后其敬之哉建興元年尊爲皇太后延熙八年崩合葬惠陵諡曰穆皇后

魏文成皇后李氏陳留李誕之女

世宗婕妤李氏李彪之女幼而聰令教之書學誦讀經傳彪常曰此當興我家彪沒世宗召爲婕妤以禮迎引常教帝妹書誦授經史上崩爲比丘尼通習經義法座講說諸僧歎重之

唐肅宗章敬皇后濮陽吳令珪之女侍肅宗於東宮寢厭不寤太子問之云夢神降我介而劍決我脅以人始不能堪燭至其文尚隱然生代宗玄宗至東宮觀藩兒視之大喜后性謙柔太子禮之甚渥年十八薨代宗卽位上謚祔廟合葬建陵

宋真宗章懷皇后大名人潘美第八女真宗在韓邸

太宗爲聘之封莒國夫人端拱二年五月薨年二十
二真宗卽位追冊爲皇后

明麗妃葛氏錦衣衛指揮使清豐葛川女洪武十九
年入宮生伊王二十六年進位麗妃

美人葛氏麗妃之妹太祖昇遐美人以身殉

世宗孝潔皇后陳氏元城人嘉靖元年立性嚴厲七
年十月崩祔葬永陵

和妃高氏錦衣衛千戶清豐高廷璋女嘉靖中入宮
安妃高氏大名高森女嘉靖二十六年選入宮後封
安妃

神宗慎嬪魏縣生員魏承志女言笑不苟萬歷初年入宮端莊貞靜封九嬪

徐國長公主神宗幼女下嫁大名潘意克修婦道待族黨以禮內外無間言志向沖淡簡嬉遊十年間惟一適西園而已視妾媵子如已出三年稱柔惠帝姬五年薨封賢靜長帝姬

唐魏州女子侯氏滑州女子唐氏當史思明之叛也相與歃血赴行營討賊滑濮節度使許叔冀表其忠皆補果毅其敢決不忘國勝於男子

高愍女名妹妹父彥昭事唐李正己及子納拒命質

其妻子使守濮陽建中二年彥昭挈城歸河南劉元佐納屠其家女時年七歲母憐其幼乞免死爲婢許之女不允曰母兄皆不免何以生爲將被刑母徧拜四方女問故母曰神可祈也女曰我家以忠義誅神尚何知問父所在西向哭再拜就死德宗詔太常謚曰愍李翱爲之碑記

元大名馮氏名淑安字靜君適山陰令李如忠前室蒙古氏有子名任馮生一子名伏如忠没氏年二十二李氏蒙古氏之族來山陰取貲及任而去馮厝如忠及蒙古氏之柩於戴山與子伏同廬墓側身爲女

師以糊口父母來欲奪其志氏爪面流血越二十年而始歸葬齊魯之人聞之莫不歎息

大名王德政妻郭氏少孤事母孝謹時德政教鄉里年四十餘貌甚古陋母欲納以爲婿使之教子宗族皆不然之氏慨然順母旣婚相敬甚篤及德政卒年二十餘節孝肫摯大德間表其閭

內黃趙美妻王氏年二十夫溺死舅姑憐其少欲令再適強以族姪爲配氏縊死至正間旌

開州谷有源妻姜氏有源至正末判蘇州遭疾且死謂其妻妾曰吾病必不起汝輩肯從予乎姜曰諾及

有源卒妻繼死同窆事聞詔旌其門

明大名張洙妻竇氏洙父崇雅知濟寧州爲洙聘於竇氏旣婚竇躬理絲枲竟夕篝火佐夫讀洙以攻苦致疾死竇哭絕復蘇自製斂具畢見洙招之應曰吾行矣抱膝長逝面貌如生

刑部郎中劉默妾武氏元城武方亮女也默年七十子工部尙書遵憲擇良家女侍父起居得武氏年甫十五貞靜有威儀勤執事寡言笑晨夕無倦容默卒武年二十有八有風以他適者武曰從一之義無分貴賤我以貧家女獲侍君子側聞義理多矣敢有他

志乎遵憲聞之感泣而拜夫婦敬禮之其諸孫男女日繁武撫養周至年八十卒祔葬賜塋

元城金廣妻李氏年二十四夫卒家貧無以自養父母欲其改適氏號泣剪髮以明靡他備涉艱難足不出閨閫者五十餘年萬厯二十一年旌

生員黃炳妻李氏炳卒時遺子二長別駕會極方九歲次少師立極方五歲炳繼母董氏亦孀居李念姑老子幼義不可死遂與董氏共撫二孤家故貧李惟晝夜紡績上供甘旨下給兩兒脩脯之費二子卒致迴輿大啟間立極疏請以雙節建坊旌表

趙遐妻陳氏遐死兄遠賣其妾何氏陳以何氏欲守節言遠給以井陳賣之陳懼遂密縫其衣投井而死魏縣薛某妻閭氏薛飲博破家賣妻以償博氏投井死守縣楊道南勒石表墓

武應元妻連氏年十七歸應元九日從俗歸寧有叛官搶掠氏大罵掌賊面死於兵知縣劉維仁祭其墓李尚斌表其門

史步雲妻劉氏貧而能孝姑病割股以進姑竟更生知縣原一魁旌曰純孝格天

南樂生員王蘭妻何氏年二十夫死遺一子名指